

# Promoziun da tradiziuns

## Giubileum da 75 onns da la Società da costums grischuna

■ (anr/hh) **La Società da costums grischuna sa festivar quest onn il giubileum da 75 onns. Il punct culminant da quel è ina sentupada l'october a Landquart. Medemamain ha l'uniun realisà ina nova pagina d'internet ed edi ina cronica.** La Società da costums grischuna ch'è vegnida fundada l'onn 1933 dumbra oz radund 800 commembras e members. En las regiuns e las vischnancas vegn ella represchentada da 32 uniuns localas e da diesch gruppas d'uffants e giuvenils. La finamira primara da l'uniun è la promoziun dals costums tradiziunals e dal saut popular. Las pli bleras gruppas s'entaupan emnilmain a lur exercizis. La cumissiu dal saut popular da l'uniun che consista da represchentants da tut las regiuns dal chantun organischa periodicamain curs per manaders, sautunzas e sautunzs. Medemamain han lieu regularmain curs regiunals. Cumpletads vegnan quests arranschaments da las occurrenz localas e da las preschentaziuns sporadicas da las uniuns e gruppas.

### Plirs arranschaments

L'entschatta mars ha la Società da costums grischuna salvà sia radunanza dals presidents a Küblis. Quest termin ha dà l'entschatta da las activitads da l'onn da giubileum. Previdas èn pliras occurrenz entaifer ed ordaifer il chantun Grischun. La fin da matg e l'entschatta da zercladur maina in da quests arranschaments da giubileum l'uniun en la Surselva bernaisa. Quel vegn cumbinà cun ina preschentaziun dal chantun al Ballenberg. L'avust organischa l'uniun chantunala in'excursiu per las commembras ed ils commembers en la regiun da la Mantogna. La radunanza annuala da l'onn giubilar ha lieu ils 18 d'october 2008 en il Forum Riet a Landquart. Cun occasiu da quest arranchament vegn dà a las gruppas affiliadas la chaschun da sautar. Per quest motiv vegn purschi musica durant 12 uras. La saira ha lieu l'act festiv dal giubileum da 75 onns. En connex cun las activitads da giubileum stat er la bursa da costums a Grisch. La fin da mars ha lieu la segunda, l'emprima è sa splegada la fin da l'emna passada.

### Edi ina cronica

En vista a l'onn da giubileum ha la Società da costums grischuna laschà stgaffir ina nova pagina d'internet. Visitadras e visitaders da quella chattan bleras infurmaziuns davart l'uniun, la tradiziun dals costums e dals sauts. Da vesair èn er fotografias d'arranschaments e dals singuls costums. Ellas dattan ina buna impressiu da la gronda varietad e dals detagls dals costums dal chantun Grischun. Medemamain ha l'uniun edì ina cronica areguard il giubileum da quest onn. Gia avant 25 onns – cun occasiu dal giubileum da 50 onns – ha *Andreas Gadmer* già publicgà ina cronica cun bleras datas ed infurmaziuns dal temp tranter 1933 e 1983. Quella cronica è daventada in impurtant med d'infurmaziun per la glied dals costums. *Emerita Ghilardi* e *Susanne Hertner*, anteriuras commembras da la supranza da la Società da costums grischuna, han uss cumpletà questa cronica cun ils schabetgs dals davos 25 onns. Il resultat final da quella lavur è ina interessanta ed attractiva cronica.



Costums e sauts populars furman ina part da la tradiziun e cultura grischuna.